

## MAURICE, WILLIAM (bu farw 1680), hynafiaethydd a chasglwr llawysgrifau

**Enw:** William Maurice  
**Dyddiad marw:** 1680  
**Priod:** Elisabeth Maurice (née Ludlow)  
**Priod:** Lettice Maurice (née Kynaston)  
**Plentyn:** Lettice Gethin (née Maurice)  
**Plentyn:** Ann Williams (née Maurice)  
**Rhiant:** Jane Maurice (née Holand)  
**Rhiant:** Lewis Maurice  
**Rhyw:** Gwryw  
**Galwedigaeth:** hynafiaethydd a chasglwr llawysgrifau  
**Maes gweithgaredd:** Hanes a Diwylliant; Llenyddiaeth ac Ysgrifennu  
**Awdur:** Evan David Jones

Mab Lewis Maurice, a ddisgynnai o deulu Moeliwrch, Llansilin; a Jane, merch John Holand, ficer Cegidfa (1586-1639). Treuliodd ei oes yng Nghefnybraich a'r Ty Newydd ar Gynllaith, ym mhlwyf Llansilin. Dywedir iddo godi adeilad arbennig o dri llawr, a elwid 'Y Study,' i gadw'r llyfrgell.

Yr oedd yn ddigon cefnog i gasglu llyfrau a llawysgrifau, i gyflogi copiwywr, ac i dreulio'i amser i gopïo ac astudio llawysgrifau. Yn yr astudiaethau hyn ystyriai mai **Robert Vaughan**, Hengwrt, oedd Gamaliel iddo. Gweithiodd lawer yn Hengwrt a gwnaeth gatalog o'r llawysgrifau a oedd yno. Daeth rhai llawysgrifau Cymraeg pwysig i'w feddiant yntau, megis Llyfr Gwyn Hergest, a gollwyd mewn tân yng ngeithdy llyfr-rwymwr yn Covent Garden yn 1810, a'r llawysgrif cyfraith a gafodd gan ei gâr, **Meredith Lloyd**, Bryn Elen (Wynnstay MS. 36). Copiodd swm mawr o farddoniaeth Gymraeg a gwnaeth astudiaeth arloesol ar destunau cyfraith **Hywel** yn ei 'Deddfgrawn' neu 'Corpus Hoelianum' (Wynnstay MSS. 37-8), yn 1660-3. Ymddiddorai yn hanes cynnar Cymru a'r Celtaid, ac ysgrifennodd lythyr ar Brennus i **Robert Vaughan** yn 1662 (Wynnstay MS. 12). Nid anwybyddodd broblemau ei oes ei hun, ac yn 1653 ysgrifennodd draethawd yn erbyn allor-addoliad (Wynnstay MS. 12), gan feirniadu gwaith y **Dr. George Griffith**, esgob Llanelwly yn ddiweddarach, a Richard Jervis, ficer ei blwyf ei hun, a dywedir iddo wneuthur cronici o ddiwyddiadau'r Rhyfel Cartrefol yng Ngogledd Cymru. Rhestrir dros 100 o lawysgrifau a fu yn ei feddiant, neu a ysgrifennwyd ganddo, gan **Evan Evans** (llawysgrif Panton 72).

Bu'n briod ddwywaith: (1) â Lettice, merch Roger Kynaston, Cefn-y-carneddau, ger y Bont Newydd, Rhiwabon, o ferch ac aeres Roger Eytton o'r lle hwnnw. Ohoni hi cafodd dri mab a fu farw'n ieuainc, a dwy ferch - Ann, gwraig David Williams, Glan Alaw, brawd **Syr William Williams**, Llefarydd Ty'r Cyffredin, a Lettice, gwraig Roger mab Thomas Gethin, Maesbrwç; (2) ag Elisabeth Ludlow, merch George Ludlow, Morehouse, a gweddw Thomas Gethin; ac ohoni hi cafodd un ferch, Elizabeth, a briododd George Jukes, y Trallwng. Yn 1678 bu ganddo ran yn ymgais **Syr William Williams** i brynu llyfrgell Hengwrt.

Claddwyd ef yn Llansilin, mewn gwth o oedran, 23 Mawrth 1680. Gadawodd ei lyfrgell i'w ferch Lettice. Prisiwyd hi gan Edward Millington, allan o restr, yn werth £60 yn 1682, a gwerthwyd hi i **Syr William Williams**. Fe'i cadwyd yn Llanforda hyd oddeutu 1771, pryd y cymerwyd y rhan fwyaf ohoni i Wynnstay, ac yno mewn tân, 5-6 Mawrth 1858, y collwyd bron y cyfan. Ar wahân i'r llawysgrifau a nodwyd eisoes, y prif rai yn llaw William Maurice sy'n aros yw **Llanstephan MS 15**, **Llanstephan MS 31**, **Llanstephan MS 54** a **Llanstephan MS 197**. Defnyddiai ar brydiau orgraff arbennig iddo'i hun, ac nid oedd un llawysgrif yn ddigon gwerthfawr yn ei olwg i'w gadw rhag ei hanurddo â'i ysgrifen glogyrnaidd.

### Awdur

**Evan David Jones**, (1903 - 1987)

### Ffynonellau

*History of the Princes, the Lords Marcher, and the Ancient Nobility of Powys Fadog*, iv, 252

*Oxford Dictionary of National Biography*

*The Cambro-Briton*, i, 379-80

*Llawysgrif Wynnstay yn Llyfrgell Genedlaethol Cymru, Aberystwyth* 143, 234

**NLW MS 732B**; **NLW MS 1505D** (418)

*Cylchgrawn Llyfrgell Genedlaethol Cymru*, ii, 26-36

*Handlist of Manuscripts in the National Library of Wales*, i, xvi-xx

*Reports of the Historical Manuscripts Commission*

### Dolenni Ychwanegol

VIAF: **58568927**

Wikidata: **Q18718872**

**Dyddiad cyhoeddi:** 1953

**Hawlfraint Erthygl:** <http://rightsstatements.org/page/InC/1.0/>



Jones, E. D., (1953). MAURICE, WILLIAM (bu farw 1680), hynafiaethydd a chasglwr llawysgrifau. *Y Bywgraffiadur Cymreig*. Adferwyd 16 Tac 2024, o <https://bywgraffiadur.cymru/article/c-MAUR-WIL-1680>

Y Bywgraffiadur

Preifatrwydd a Chwci  
Hawffraint  
Y Prosiect  
Cymorth  
Cysylltu

LGC  
NLW

LLYFRGEL  
THE NATION



Yn ddiwedd  
Llywodraeth Cymru  
Supported by  
Welsh Government